

EVENTI

Ta Mont: paradisi de la families

L temp à premià l'organisazion ezelenta che, ence col smendrament de orarie, à fat de la festa te la Val de Sèn Nicolò n auter bel suzess



La gran banca con colores e paroles ladines è stata teater per n muie de foto.

De più su lausc.it

Jà te la prejentazion en vender te tendon la paroles de legrezza e gaissa per la 12^a edizion de la Festa ta Mont se à enterzà a cheles più mesties, che metea su l'avertida la jent del dan fat dal tormen Vaia. Defat la pruma imprescion, ruan te Val de Sèn Nicolò, l'è la desolazion a veder duc i èlbres crodé: n despiajer che ampò zet n'outa rué ite, olache la val se averc, bela e cercenèda dal bosch. Sobito a dèr n benvegnù ladin l'è na gran banca, bruna, biencia e verda, olache la jent se senta per na foto sot la paroles de la ciantia: «Jo che se pel goder pasc de Paradis...».

Apede l troi n muie de tulins conta la storia de pèstres e bachegn, de l'arlevament e de l'economia del lat. L'è chest defat l tem de chest an, per recordèr che l'ambient tant bel de la mont l'è frut del lurier de nesc giaves, che colassù jia a monteèr l bestiam.

L'è n piajer fèr l percors de la festa, n bon pèr de chilometri, en compagnia, te n bon tempram, passan apede la tiejes olache i volontères de la sociazions del Comun e de la Val laora ensema, i se grigna, i enjigna e i sporc ogne sort de roba da magnèr e beiver, e endèna i renforza l spirit de comunanza.

No mencian i spetàcoi: l'ator badiot Simon Kostner è bon de rejonèr, semper a na vida lijiera e gustégola, de identità e lengaz ladin, de Dolomites e stravardament de l'ambient, de musega e valores da mont. Valores che vegn recordé enche da don Andrea te la messa ofizièda te Mesaselva, compagnèda dal Cor de geija e dai sonadores de corn da mont.

Anter esposizion de retrac, zipiadores e sonadores, à emper più lèrga i jeghes. Apede a la "mitica" teleferica del Socors, ti prè ta mont l'è percorsc sensorièi e jeghes culturèi, trampo, la compieta, l tof e etres jeghes de legn da zacan, endrezé soraldut da la sociazions Bambi e Inout. La Festa ta Mont, che chest an à smendrà l'orarie seran sù da les 6 da sera, doventa semper de più na festa per bec e families. L president del Comitat de endrez, Roberto Bertacco, disc che no i sà amò i numeres, ma dut é jir ben, la jent e i volontères é stac contenc e de roba da magnèr no l'è vanzà beleche nia: vegnarà fat amò vèlch valutazion, ma l'è l'idea de jir inant cosci.


Lucia Gross



Enlongia strèda i gregn tulins moscia la produzion del lat e del formai.



Picoi volontadives cresc tel spirit del fèr vèlch adum per la comunanza.



Simon Kostner à rejonà con ironia de n muie de temes leé a nosc teritorie..



Don Andrea con servidores e ciantores endèna la messa te Mesaselva.